

RISPOSTA DI PETRU GHIONGA  
À Mma Josepha GIACOMETTI  
À NOME DI « CORSICA LIBERA »

OGETTU : Disfunziunamentu in l'insignamentu bislingu

Madama a cunsigliera, avete a raggiò di rimarcà chì st' affare va al dilà di e nostre competenze... malgradu 'ssu puntu quì, a vostra dumanda ùn la vogliu micca scansà, chì l' affare ci primureghja assai.

Hè in fin'di contu u prublema di a leia trà a nostra cullettività è l' autorità accademiche, dinò quellu di u cuntrolu nantu à u terrenu di l' applicazione di u nostru pianu...

- Pè rispondevi nantu à u 1u gradu : u ritturatu ci hà spiegatu e so difficoltà à truvà maestri bislingui. U prublema hè quellu di a furmazione è di l' assenza di rimpiazzanti, cumpetenza di u Statu. Ci vole à uttene una vintina di posti in u prima gradu. Per quessa a CTC un pò chè dumandà ma ùn si pò sustituisce à u Statu in u quadru attuale di a spartizione di e cumpetenze.  
Vi ramentu chì ancu u sgiò Presidente Sarkozy si era ingagiatu à mette in opera u pianu eccezziunale di furmazione... Emu scrittu tandu à u ministru, ma risposta micca ! Eppure simu stati à l' iniziativa di reunione cù u retturatu à stu sugettu ma chì pè u mumentu ùn sboccanu micca nantu à una suluzione.
- Pè u 2u gradu : N'emu discutatu parechje volte cù i servizii di u retturatu di u prublema di l' insegnamentu in lingua corsa. Emu dumandatu è ottenutu u lanciu di un' inchiesta « qualità » nantu à e filiere bislingue, val' à di u numaru di materie insegnate IN lingua corsa. U custatu ch'è pudemu fà hè u listessu ch'è u vostru. Bisognu ci hè di una vera discussione nantu à ssu prublema. A lettera quadru di u Rettore ramenta puru a norma in quantu à l' insegnamentu bislinguu, ma a messa in opera pare di pone un prublema. Certe filiere di u 2du gradu serianu spruviste d' insegnamentu di e discipline IN lingua corsa. Ùn so dunque più filiere bislingue, quesse, è l' emu da di à u Retturatu.

- E nostre pruposte so cuniscute : u sistema *un maestru / una lingua* chì permetteria di multiplicà e scole bislingue è attelli di corsu in prima gradu cundutti da professori certificati di u sicondu gradu

In quantu à l'evoluzione di statutu ch'è vo bramate hè in custruzione, a sapete ; è pinsemu ben sicuru ch'è senza statutu specificu, niente serà pussibile.

E riunione d'urgenza: emu avutu l'iniziativa di riunione nantu à a furmazione di i parsunali di l'Educazione naziunale, u prublema hè chì hè a cumpetenza sana sana di u Statu. Per ciò chì hè di a pulitica d'insignamentu simu ind'u perìudu di valutazione di u pianu è emu dumandatu à u rettore certi sciffri...

Vulia pricisà chì emu publicatu l'apertura di un postu d'Ingeniore Coordinatore Pedagogicu Lingua Corsa chì, precisamente, averà in carica a leia *Furmazione Linguistica / Accademia* è chì puderà suvità u sviluppu di u pianu d'insignamentu pè i sculari è pè i maiori.

Al dilà, stu novu statutu prupunerà un'evoluzione di e nostre cumpetenze...